

四庫全書

集部

欽定四庫全書

集部  
元詩選二集卷三  
四

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣萬培成

欽定四庫全書

元詩選二集卷三

庶吉士顧嗣立編

趙教授文

文字儀可一字惟恭號青山廬陵人初名宋永  
從弟宋安字功可以文章齊名號二趙先生嘗  
三貢於鄉由國學上舍仕南雄府教授宋亡隱  
居不出時當路屈者年碩學主湖山講席強起  
為東湖書院山長尋授清江儒學教授青山為

詩文脫畧涯岸獨自抒其所欲言晚年頗以理學自任進進未已臨川吳澄嘗答書云邇來舉子業廢稍能弄筆遣辭者英華無所發泄拈掇小詩之外間或以此為務合東西數道可僂指者不三四而足下其一也

何和尚尋母

并序

何上饒人因丙子亂失母乃削髮為僧刺血寫經遍天下尋之至燕值國方會僧六萬三千人

何於會煉臂有一僧問有何願受此苦何具言  
所以僧云京兆府金鄉縣張官人宅問之即往  
詢求乃知俱往吉州仕宦矣何到吉州大和得  
知張名守德為大和尹乞食至門曰我信州人  
有母在此閭人言母出不復認何言我辛酉生  
母乙巳生具言外氏祖父母方記憶相向大哭  
蓋母由他人三易主矣張令加冠巾約為免許  
為娶婦何曰初事佛求母豈可得母負吾初心

乃陳省以母不當擄張以為買引法力爭之何  
日哭于省前當有仁人哀而助之者後竟得母  
以歸

寫經母血盡長素母容枯燒蜜煉頂臂孰非母肌膚豈  
不痛至骨為母忍斯須南北萬餘里來往如趁虛天高  
孝可感報應非浮屠出門訪東家遇否不可虞茫然求  
我天再見得所圖昔者別兒時那有此頭顱明明陳左  
驗大慟絕復蘇向來相妒人泣下成畝畝收淚相勞苦

何異得乳雛不即遂其志彼張非丈夫冠巾有婦子諒  
亦母所娛為佛再有母初志不敢渝但期百年內奉母  
與佛俱雖非聖賢事區區守其愚為君賦高誼感我真  
窮孤棄我十二年人母我獨無天涯尚可尋地下不可  
呼

娘好怨

團圓一片冰出自蠶女紅何言入君手動搖生清風一  
朝棄篋笥零落如秋蓬時節自當爾君子詎無終

瓊花上天歌

朔風吹沙堆浪白二十四橋沈冷月顛風夜半撼蕪城  
雪萼瓊絲破空碧金餅歲歲獻君王玉罌泛酒蓮花香  
明光殿暗沙漠遠人自無情花斷腸落盡飛天識天路  
何如拔樹飛昇去唐昌游女再歸來城中只賣瓊花露  
江南停客吟如叫想像裁辭不成調天宮夜半按霓裳  
玉女擎花紫皇笑

壽王餘慶



即時杯酒不須名最愛先生醉是真雪柏霜篁千歲壽  
川花池草幾番春少陵句妙驚山鬼老子心閒養谷神  
如此眼前聊一笑此生猶是太平人

雲陽寺

步入雲陽俗興闌山靈應不掩雲關禪房深鎖寺應古  
經鐫不開僧更閒菊綻黃香霜秀山堆秋色露痕斑  
留侯千載空陳迹援鶴聲聲拱夜壇

詠梅

白玉堂前野水濱，何曾榮悴異精神。  
當于香色外觀韻，可怪冰霜裏有春。  
天下無花堪伯仲，江南惟爾不風塵。  
欲將素王相推戴，老向山中作素臣。

哭亦周弟

去日相攜涉畏塗，歸來形影自相扶。  
倦行小憩荒山路，怕聽深叢叫鷓鴣。

贈媒者二首

青鸞解報仙郎信，紅葉能傳禁女情。  
東家把酒西家笑。

只作春風過一生

空谷佳人獨笑歌不煩花鳥使相過紅妝洗却蛾眉醜  
縱有良媒可柰何

上之回

武帝元封初因之雍遂  
通回中道後數臨幸焉

動皇輿回中道龍為驅虎為導樂蕃釐祠雍後息甘棠  
飲天酒澹穆清冰熱惱曰夷服咸稽首臣三祝皇萬壽

有所思

古樂府有所思後半篇  
殊不可解略改正之

有所思乃在大海南何用贈遺君雙珠璫瑁簪聞君有

他心當風燒之揚其灰從今已往勿復相思勿相思又  
相思秋風蕭颯晨風颼颼心思君兮君不知

公無渡河

公無渡河或作筓篴引朝鮮津卒霍里子高妻麗玉所作也高晨起刺船有白

首狂夫被髮提壺亂河流而渡其妻隨止不及  
遂墮河水死于是援筓篴而鼓之作公無渡河  
之曲聲甚悽愴曲終自投河而死子高還以其  
聲語妻麗玉傷之乃引筓篴而寫其聲聞者莫

不墮淚  
飲泣焉

河之水深復深舟以濟猶難堪被髮之叟狂不可箴豈  
無一壺水力難任與公同匡牀恨不挽公襟亂流而渡

直下千尋我泣眼為枯我哭聲為瘡投身以從公豈不  
畏胥沈同歸尚可忍獨生亦難禁公死狂妄死心蛟龍  
食骨有時盡惟有妾心無古今河之水深復深

團扇歌

晉王珉與婢有情好婢鞭撻過苦婢素善歌而珉好持白團扇故云團扇復團扇

許持自遮面憔悴無復理羞與郎相見

私衣必見污葛屨必遭踐生世不為男託身況微賤悲  
痛只在心憔悴更障面出入懷袖中羨郎白團扇

丁督護

宋高祖女夫徐達之為魯軌所殺高祖使督護丁旰收殮之達之妻呼旰至閣下自

問敘送事每問輒歎息曰丁督護其聲哀切後人因其聲廣而為歌焉

丁督護為我行去時馬上郎今作野外殤男兒肯斷頭  
婦兒空斷腸丁督護聽我語欲從君臂不羽嫁時所結  
髮剪之隨君去丁督護念我苦未亡人殤鬼婦古若無  
銜冤乾坤無風雨

上陵

上陵漢章帝元和三年自作為上陵食舉

上古陵古陵無可上苔雨繡澀草煙悽愴鷓鴣號荒林  
狐狸穴空壙豐碑去梁何處津望周作竈誰家場不如

東林一杯土樵牧侵陵白官府

銅雀臺

魏武帝遺令嬖好美人皆著銅雀臺上施八尺林總帳日晡上酒脯月朝十五向帳

作伎汝等時時登臺望吾西陵墓田後人悲其意而為之詠魏志云建安十五年太祖作臺于

鄴鑄銅為雀置於臺上因以名焉

朝望西陵墓夕望西陵墓望望不復歸月朝又十五月  
朝十五可柰何更對空帷作歌舞銅雀昂然飛不去當  
時美人髮垂素我生不如陵上樹年年樹根穿入土

法壽樂歌

古詩未始道佛事梁武帝即位後更造新聲帝自為之辭帝既篤敬佛法又制

善哉天樂天勸大道仙道神王龍王滅過惡除  
愛水斷苦輪等十篇名為正樂皆述佛法又有  
法樂童子伎童子倚歌梵唄今所  
謂舍利佛法壽樂歌皆所自出也

西雲垂天飛流黃寶鬘百萬隨風揚帝居摩醯首羅鄉  
采女如花侍帝傍珠啼玉唾花香澹然神情無世妝  
下視邢尹紛醒狂梵唄琅琅出清吭天庖供饌薦豆觴  
帝飲食之壽以康恒沙世界俱來王天王神聖臣忠良  
春風萬里酣耕桑雨滴可數海可量無有能知法壽長  
願梵天釋帝萬億歲歲壽杯天下醉



劉教授堦

堦字起潛別號水邨南豐人研經究史網羅百  
氏文思如湧泉宋季與同里譔祐自求各以詩  
文鳴年三十七而宋亡越十八年當路交薦署  
昭郡學正年七十受朝命為延平教授既滿諸  
生復留授業者三年乃歸延祐六年卒年八十  
所著有經說講義水雲邨豪泯豪哀鑑英華錄  
隱居通義凡百二十五卷

補史十忠詩

并序

詩以厚倫美化為本非曰諧俗寄情而已即千  
篇奚益每思張許二顏同時死國名芳唐史與  
天長存近代死節數公何媿往昔顧麥秀黍離  
無繇做柳州狀逸事上太史庶幾不朽竊以慨  
念更後幾年遺老漸盡舊聞銷歇將無復知有  
斯人者悲夫哀哉死臣子職分古人常事爾死  
矣寧顧其傳不傳乃亦不可無傳者為其繫彝

倫關風教厲後代之臣子  
媿前日之不如數公  
者也采清議得忠義臣十人  
史不書各賦十韻  
纂其實曰補史詩

知潭州湖南安撫使李公

芾

三已甘退休十連起遲暮  
伊誰急求子流落乃不怒  
黑雲來如山殺氣震平楚  
恭惟君父命封疆以身護  
闔門義不辱呼卒汝善處  
飛魂隨劍光自己投火去  
天泣鬼神愁地搖山岳仆  
吾非莒柱厲敢以死醜主  
正自常事

耳命義逃安所冲遠誰與儔睢陽有張許

吉愷字祖冲  
丁穆字彥遠

皆晉  
忠臣

池州通判權州事趙公

卯發昌州  
人妻雍氏

若人作何狀立節乃殊偉人言此蜀珍位卑名未起生  
分秋浦月攝此千里寄沙頭風色惡寒城凜弘峙吾聞  
開關迎棄遁亦復恥茲惟城郭臣大義吾知已問道走  
帛書灑血別玉季細君絕可人雙飛同一死南八彼男  
兒此婦乃如此骨朽香不廢吾詩當青史

丞相都督信國公文公

天祥丙辰狀元

時平輒棄置事迫甘前驅嗚呼忠義臣匪直科目儒江  
寒朔吹急列城同一趨豈不寄便安綱常乃當扶移檄  
倡諸鎮奮袂躬援枹川決莫我回萬險棲海隅天乎復  
不濟道窮竟成俘一事事乃了吾頭任模糊悠悠寄好  
名責人無已夫三衢有魁相投老作尚書

三衢魁相  
謂留夢炎

參政行丞相事陸公

秀夫

天地無託足海天同隰光明知復何為不忍隳三綱裸

卷三  
薦凱少延謳歌寧遠忘或者莒在齊耶且帝一方竭廢  
竟委頓臣謀非不臧運去天莫留力盡心彌強終不負  
吾主名義天地長懷璽隨龍遊舉空水中央斯人文華  
士乃爾百鍊鋼機雲儻道譜應修朝洛陽

前左丞相江文忠公萬里弟

萬頃

匡廬雲錦屏鴻儒產其下風神儼如龍天矯莫可駕卷  
懷經濟具婆婆洛中社怪事玉牀搖清晝天忽夜突騎  
從何來陰風飄屋瓦大臣義有死欲避吾不暇庭前環

止水萬事付一捨從容友靈均朝野動悲吒愍章極哀  
榮汗簡誰記者倘有南熏書季方足堪亞

江西制置司都統密公

侑

臣有置身義豈計官崇卑偏將知死忠不曰天下奇漢  
節既披靡失位趨江西閭帳駐臨汝招徠樂其歸雪寒  
南浦愁羽檄蘄濟師一將奮風虎鼓行亟颺馳踰嶺疾  
戰苦裹瘡呼健兒坐縛膝不屈伏鑕甘如飴小臣裨校  
耳職也宜死綏廬州大將在白首豎降旂

淮東制置使知揚州李公

庭芝

淮海接風塵胡乃似鐵壁臥護有天人十載藉福力重  
來人未老愁絕事如昔苦戰孤城危痛哭天柱折夢遊  
三山上人倫浮海出突圍志南征吾欲重建極天弗鑒  
臣忠冥冥墮叢棘先軫面如生萇弘血化碧臣死誰復  
知臣忠終不易一將更大事嚼舌死罵敵

樞密閩廣宣撫使陳公

文龍  
戌辰狀元

淳熙名宰孫北德粹如玉決科魁偉英駸駸薦官肅類



田煩諫疏相嗔俄嗾遂補郡仍免歸黃流已漫陸天族  
日光薄力疾支顛覆蹉跎南冠繫道病死不辱往昔五  
峯堂傾蓋語跋燭斯人真妙人哀哉慳厚祿長揖丙辰  
魁各天並黃鵠不有二忠臣千古笑科目

少府樞密使張公

世傑

士有守節死豈以責武夫武夫尚能竒消得銀管書何  
許熊虎英鐵面美顏須護寒久枕戈赴難甘捐軀金山  
定活著志願嗟違初江心集羣策炎精同一噓間關障

海濱萬死存趙孤時也可柰何北風散檣烏漂漂竟何  
之無乃膏鯨魚渭濱多貴將反笑斯人迂

四川制置使知重慶府張公

珩

坤維拓提封形勝古天府血戰五十秋零落餘八柱江  
南傳箭急誰暇此回顧落日古渝城杖鉞乃甚武天東  
甌雖墮吾自強支柱渡瀘躬討逆歸來戰彌苦蕭條下  
夔門機穽伏中路咄咄快敵仇誰歟掩坏土哀哉關西  
雄國亡猶不負同時督軍將腰金插雙虎

止法

喬木長千年終不到霄漢怒濤長千尺終亦有畔岸倘  
非分限本截然波吞天地枝插天位極三公殊未愜粟  
積千倉猶道乏黃金滿匱尚求多華屋連雲常苦狹人  
心無足時天道有止法

送黃修永之武夷杜清碧學

眼中塵中政昏昏華蓋風高翠入雲一代風流超晉宋  
百年禮樂寄河汾波寬好看魚龍化天遠空憐雁鷺羣

亦有平生觀海意出門萬里獨慙君

鶴

延頸池邊照影池花明柳淨思依依年深色重丹砂頂  
日暖光浮白雪衣晴月夢回三島去看雲思上九霄飛  
玉簫聲斷秋宵冷應有仙人憶未歸

燕

萬里來從海外邨定巢時聽語頻頻簾風半卷重門曉  
社雨初晴二月春尾上繫詩成往事掌中學舞是前身

華堂茅屋依然坐幾處相逢舊主人

西捷

神器寧容小智窺黃河河上集王師六龍南面皇威壯  
萬里西征凱奏馳穹壤有靈扶寶祚風霜無地著金枝  
太平有象天顏喜大需看看下玉墀

拜南豐先生墓

崖挾飛泉響珮環雲涵空翠鎖幽關斜陽影戀殘碑外  
遺像塵昏古寺間漢苑夢回流水在越陵風急此山間

悲懷豈但元豐老望斷天南月一彎

率諸友祭南豐先生墓

星斗文章煥九天蕭蕭松檟暗荒阡久無世胄崇祠像  
賴有山僧守墓田俎豆春回修廢典佩衿雲合禮前賢  
此行莫作嬉遊看回首元豐重愴然

如邨先生劉麟瑞

麟瑞字

開

號如邨壩次子至治間嘗以暇日

追惟宋末仗義死節之士搜討遺事賦五十律

題曰昭忠逸詠邑人趙景良秉善合水邨補史  
十忠詩為一編附以汪水雲方虛谷諸君子傷  
時悼事之什若干首總謂之忠義集云

忠義總管田公燧鳳守李公寔

天西戰士競銜枚乘會關夷路始開兩蜀金湯隨水逝  
三秦烽火照天來鳳州文武渾無媿馬嶺英靈只自哀  
後夜魂歸何處寓隴頭瀟灑一枝梅

西和知州陳公寅守將楊公銳

陰風蕭颯起黃埃鐵騎追奔動地來石堡梯空天險壯  
水門罅隙殺機開不期溟海鵬千里自守封疆鴟一杯  
四十萬民登鬼錄伊誰為使哭聲哀

沔州知州楊公

起

通判王公

友仲

談笑誰將敵將殘沔陽屯戍怯孤單兵威到處降非易  
地利乘機守亦難五馬交綏凝血碧貳車含憤剖心丹  
文臣武將均無忝不負吾君不素餐

階州守臣董公

鵬飛



相傳報怨撼階州虎旅飛來晚敵樓櫓矢蔽空天入冥  
鵝車衝壘地生愁金城魚肉千年恨闔境衣冠六日休  
莫怪傳家猶強項雲孫忠節更風流

天水知軍時公

當可

西河總管陳公

瑤

天水西河兩將強七書貯腹負剛腸魚麗陣布刀如雪  
馬革尸空骨似霜蘼蘭昔存秦莫敵闕張今敗蜀終亡  
輕財得士人猶惜長想英風慨智囊

都統曹公

友聞

及大安夜戰死節諸將二首

鴈塔名香本一儒執父幾度為前驅元戎却敵世間有  
教授提兵天下無花石峽塵忠勇奮水牛嶺度死生殊  
英風壯節誰能匹千載人稱大丈夫

勇戴兜鍪學六韜赤心報國是英豪徧身膽在存全蜀  
盖世名高憎短曹難堡出奇師旅沒龍門盡銳弟兄勞  
當時制帥猶多計獨向深山遠遁逃

制參王公

翊

十萬天兵壓錦城繁華一瞬鎖連營小臣獨守紅蓮幕

大義難忘白玉京  
虎倒龍顛塵濺  
濟天陰雨濕燐  
縱橫  
皚皚白骨成京  
觀愁絕靈龜名  
禍萌

權知文州劉公

銳

通判趙公

汝

江流移浚向南山  
渴死全城膽亦寒  
叛將踰城機盡泄  
嬌兒飲藥淚空潸  
封疆事去君臣在  
忠孝名存父子難  
五萬軍民同日盡  
可憐巷戰尚闕闕

出入韻

縣漢簡州諸公

縣漢風酸動殺機  
北來鐵騎徧驅馳  
幾千里地方刀運

百萬人家骨肉糜鬼哭神號無限恨蠅姑蚋最有餘悲  
平生食祿何從避留取香名百世垂

金州守臣和公

彥威

統制楊公

福興

貔貅曾是守饒風扞拓金房未易攻十八谷開通敵外  
五千兵勁入關中賀蘭不救睢陽敗諸葛猶存越雋功  
當日更推楊統制馬傷軍沒箭飛紅

都統何公

進

張公

珍

老將由來進退宜幾回料敵計何奇地分南北興亡兆

天限關山戰伐疲兵已不支猶奮臂將仍盡銳慨興尸  
坤維烽燧休頻舉猶恐英魂待出師

同慶知府李公

沖

偕死節諸公

諸公耿耿抱精忠災運將灰日不東北戎躡陵羣盜劔  
西陲震蕩列城空香凝燕寢榮何在鼎沸魚游計已窮  
玉石俱焚天亦泣千年誰為憶高風

四川制帥陳公

隆

狼煙又起錦城邊帥閫謀疎亦可憐先軫元歸應有恨

長弘血化豈無冤百年莫贖誰三酹一死真成蓋萬愆  
遺事如今人不記綱常猶幸立西川

臨江軍守臣陳公桂

元

衡湘幹腹抵清江太守乘城誓不降  
哨馬遠嘶驚墜鎬雄兵遙吒殞飛鏑  
玉麟符已還宸陞金鳳州堪隱帥幢  
寄語豫章徐孺子聞孫勛業歎無雙

總統黃公

仲文

保義廉公

節

誰刑白馬誓西園背却宸旒棄塞垣  
存孝得名嗟虎噬

鄺瓊失節效庸奔父天母地君知否婢膝奴顏子勿言  
罵不絕聲軍又散更無人肯為招魂

觀使許公

彪祖

元戎忽已化鯢鯨少長呼來就此烹科第昔曾誇冠世  
衣冠今忍負平生休教秉筆修降表乍可捐軀肯獻城  
壹惠已彰幽壤慰巍巍廟貌煥高甍

都統張公

桂

金公

文德

已獻金湯又返鋒師奔山市甲猶裹鼠曾守隘機潛伏

猿欲投林計已窮祭纛有靈嗟二將死綏無愧慨孤忠  
度瀘露布誰人筆漫詫當時制帥功

援襄都統制張公

順

滔滔一水會襄流派接均房密運籌虛舫設機要弔屈  
危檣抵壁暫安劉千兵效死旌麾合一將捐生介冑浮  
獨遡長橋猶不暝為持忠節報凝旒

援襄都統制張公

貴

忠勇堂堂貫斗牛英雄端不愧兜鍪鏖鹿門雲合張羅網



龍尾波翻化鬪艘雙廟有靈開正祀孤城無援屹中流  
由來死節男兒事却笑明年有客羞

守襄都統制牛公

富

范公

天

將軍志喜豎降幡偏將能知大義存頭觸危樓輕烈燄  
胆經孤館凜忠魂聲沈刁斗摧城影塵掩干將滲血痕  
世遠事殊遺老盡更無人解說襄樊

沙洋堡裨將邊公

居

誼等

兵威破竹列城驚誰信偏裨不肯迎兩箭離弦聲霹靂

二雄交斃氣崢嶸可憐侯服微臣在忍見人間大厦傾  
萬木凋零風雪裏尚餘鐵樹一花明

池州通判趙公

邦發昌  
州人

分守池陽歷幾時坐看戰馬四郊馳半空矢石應難禦  
一壘樓臺未易支血染帛書身永訣壁題詩向世長辭  
細君含笑從君後忠節雙雙今古奇

饒州守臣唐公

震

遊騎如飛漸列營誰呼妓女出郊迎奔踰後圃逃生拙

執辱中庭就死明  
反甕掩形慵屈膝  
金章繫肘各輸城  
太常定謚應無忝  
贏得中流砥柱名

丞相江公

萬里知府江公萬頃

名重天閭侍太微  
昔年南國秉樞機  
人歸綠野身猶健  
兵滿紅塵世已非  
止水亭前風淅淅  
鄱陽城外草依依  
棣華相映人間瑞  
節惠隆名世所稀

宗室趙公

崇源

南風不競慘悲聲  
幙燕泥牛總是驚  
玉牒名香時已逝

金枝花悴本難榮身明六籍忠仍孝軍滿孤城死亦生  
後度推敲明月夜江邨邨外寄幽情

端明招討使汪公

立信

如此奇才正可憐曾陳大計為安邊天存廟社施籌策  
地限藩籬老歲年獨眼明明尋趙地丹心耿耿向淮堧  
江南寸土聯區脫慟哭高沙赴九泉

丞相信國公文公

天祥

金字牌飛出建章鬱孤萬壘為勤王驅馳嶺海君臣寓

囚繫燕雲道路長六籍一時光日月孤忠萬里立綱常  
元歸凜凜渾生氣南北人誇姓字香

從文丞相諸公

杜許鞏信尹玉趙時賞張汴劉洙  
繆朝宗孫宗孫東陳龍復蕭燾夫

彭震龍  
蕭明哲

奉檄勤王出賴城願從魁相立勲名吹噓炎運延千載  
莫笑寒儒隊五兵常郡戰餘森廟祀空坑敗後麗官刑  
英才樓拍那能盡凜凜英魂死亦生

常州守將王公節

安

知府姚公

嘗

守合名垂二十秋將軍今度更風流人誇同谷英風壯  
天使毗陵殺氣浮守義只知伸我膝成仁那肯護吾頭  
將門出將真男子一任模糊血髑髏

閉門高臥本無惊起守鄉城更總戎名姓已符前代史  
邦家能衛古人風金山不長僧成識鐵壁雖堅卒易攻  
城守兩回希世事橘香不泯氣如虹

湖南安撫知潭州李公

節

平楚樓頭矢石驚焚香稽首別宸京盡殲妻子期全節

寧死封疆不忍生烟燄張空隳趙壁旌旂倒影下湘城  
善刀人在同觀化名與澄江一樣清

知衡州尹公穀

燕寢凝香未赴衡却從湘帥守湘城衣冠望闕臣辭主  
詔誥陳庭弟殉兄劫火鍊成忠孝種英風鼓動懦頑名  
滿城畫節榮今古三百年餘德澤情

江東運判趙公淮某氏妾

石頭城昔號金湯岌岌孤墉戰馬場西日突圍逃溧水

南冠荷校說維揚血凝漢節誇男子身寄秦淮藉女郎  
千載妾身貞更潔仰天哭向水雲鄉

都統制密公

祐

漢鄂塵飛路已迷殘兵早發向江西豈知主帥輸城邑  
漫使偏裨效鼓輦就縛呼天懷象魏臨刑吐氣幻虹霓  
酸風慘澹精魂遠龍馬坪頭戰鬼啼

沙市監鎮司馬公

夢求

荆水滔滔百尺渾邇來淺縮漫潺湲木城聯岸風輪吼



沙磧屯雲火炬燭效死小臣懷綠綬偷生大閭媿朱轡  
下官名姓君知否涑水先生七世孫

淮東制置使李公

庭芝

淮海曾聞一偉人十年臥護息邊塵重來鐵騎攻城急  
旋執金戈赴陣頻夢入甌閩期立極路遵通泰倏捐身  
平山堂下悲風起魂繞瓊花萬樹春

都統制姜公

才

君是礮谿幾葉孫六韜貯腹護邊屯三軍鏖戰嗟無地

孤壘環攻恨出門嚼舌血飛憐勇士衝冠氣憤憶忠魂  
男兒南八今重見同翫睢陽月一痕

浙西提刑徐公

道隆

湖守趙公

良淳

太湖殺氣貫天章貔虎如雲壓古杭羽檄星馳徵魏闕  
牙檣風逆急勤王軍摧鋒鏑鬼猶厲將躍波濤骨亦香  
更有湖州賢太守細君同壽碧蘭堂

參政高公

應松

腸斷吳山錦繡叢六更聲絕海潮空千門鎖月移行在

八駿乘風憩會同  
扈蹕孤臣慙主辱  
征鞍萬里哭途窮  
兩宮緩緩趨朝陛  
回首天南獨死忠

蜀帥張公

珏

玉壘浮雲五十秋  
關西旣將勇無儔  
三吳旣墮猶堅守  
八柱胥亡不耐愁  
瀘水捷收勞腰裏  
夔門機伏失兜鍪  
吾君不負吾寧死  
遺恨誰憐快敵讐

大社吳公

楚才

誰道盱江一布衣  
龍韜虎畧豈知蹊  
鉏耰列陣螳初奮

金匱要略卷之三  
鞀鼓臨風馬已嘶  
漢將追奔飛白刃  
楚囚繫紲化紅泥  
寵褒已矣忠難泯  
不向泉關歎噬臍

儒士王公

士敏

此行無復望生還  
留取哀吟宇宙間  
報國豈能恢漢土  
遺民空自戀吳山  
清風勁節英靈在  
斜日沈輝歷數慳  
寂寂園扉終不悔  
忠魂莫恨左輪殷

樞密丞相陳公

文龍

曾聽臚傳冠集英  
當時御筆為更名  
淳熙相譜家羶復

德祐樞臣國脈傾鄉部孤臣迷殺氣囊山一鼓張軍聲  
首丘只戀行都土愁絕萱闈訴不平

嗣秀王

與

瑞安守臣

洪

派接天潢本近親更生忠節古無倫千軍守禦來閩路  
半歲勤王護宋民巷戰血流生不辱劒飛魂逝死能伸  
風流喜遇莆城友攜手泉局萬古春

建寧儒士朱公

浚

身披薜荔去瓊琚遞遞南來八使車人隱考亭春自遠

馬嘶春水難誰紓好扶名義垂千載不把衣冠辱四書  
為守彝倫先訓在潔身珍重返吾初

處士林公

同

九廟三宮已盡傾尚從海島寄神京血書矮壁存吾節  
氣貫長虹任汝烹身隕九京忠義著名香七聚鬼神驚  
海風蕭颯含悲憤疑是當時肆罵聲

丞相陸公

秀夫

八面兵威八面攻馮夷飛血洗千蓬波翻水寨乾坤震

風仆牆旂社稷空百辟散班奔鷁首孤臣扈蹕憩龍宮  
茫茫南國重回首一片丹心照海紅

樞密張公

世傑

曾擁貔貅奏凱歌匡山雲暝竟蹉跎地空九有棲荒服  
寨列千艘保海阿龍躍壘沈天若此烏鳴矧絕事如何  
鯨波沃日炎光熄凜凜英魂尚枕戈

江東制置使謝公

枋得

草履麻衣漫蔽形十年賣卜慣零丁願從楚地師龔勝

欲向遼城友管寧采石吟成期絕粒娥碑讀罷棄餘齡  
一門盡節均無愧千載西山疊疊青

廣西經畧馬公

堅

赤白囊飛廣海濱關西勁勇是奇人暫提節印期全璧  
倏報烽烟又震鄰械坐已空身不化龍韜未展氣如神  
鑑湖亦有雲仍在千載流風豈隱淪

美人朱氏

給事中宮已歷年蒙恩扈從赴幽燕名王索好緣難合



烈婦捐生節已全日晏寢門疑鎖鑰夜長驛館泣嬋娟  
同來小妮猶堪詫一樣清風兩地傳

孺人林氏

兩家累世結昏姻閨閨崇崇作宋臣忠貫鵠原期報國  
刑驅鴛侶誓全身名傳閩嶠花如玉血染吳鉤草作茵  
魂隱暗香千樹裏傾城傾國愧斯人

死節諸公

往事猶疑曉夢圓當年扶義付飛烟姓存名沒時難問

國破家亡事不傳青史寂寥忠義傳赤心勃鬱死生年  
文謨武畧渾無展猿鶴沙蟲亦可憐

三百年餘雨露深杭雲汴雨兩銷沈堪憐許遠張巡節  
誰識程嬰杵臼心萬里關河空感慨兩京歌舞莫追尋  
遺民已盡遺風遠遺事何人共細吟

小主納款

天目山崩歷數終降幡颯颯出孤墉六龍卷霧歸三島  
八座迎風啟獨松塵掩玉階消王氣潮移雪屋示軍容

由來興廢天難問，斷碣頽垣泣曉螢。

史貞女祠

此詩見符  
觀漂陽志

石頭城昔號金湯，岌岌孤墉戰馬場。  
西日突圍逃漂水，南冠荷校說維揚。  
血凝漢節誇男子，身寄秦淮藉女郎。  
千載一門忠與烈，仰天哭向水雲鄉。

稼邨先生王義山

義山字元高，富州人。生于宋嘉定間。義山治易，  
兼詞賦。四以賦薦景定壬子，為九題之冠。壬戌

試別闈放榜考官見義山名皆以得人為賀廷  
試乙科授永州司戶闕累陞通判瑞安軍府事  
丙子宋大皇詔官民歸附遂還故山以讀書著  
文為事至元己卯行中書省俾路學以贄幣禮  
聘於家辭勿獲遂教授諸生明年使掌江西學  
事辛巳退老於東湖之上環所居皆蓮名其堂  
曰君子又於先廬之旁扁一所曰稼邨四方學  
者皆稱為稼邨先生一日整衣冠端坐而逝年

七十四所著有稼邨類稿如齋居雜興云詩思  
已隨春意動夜衾不怕曉寒新贈陳梅垣云一  
枝瀟灑無塵浣半夜高寒對月明和九月十日  
紫極登高韻云滿斟綠斚安排醉牢裏烏紗照  
顧吹亦復刻意求新但全篇率多累句不免瑜  
為瑕掩耳

挽遂初陳尚書

到得咸淳國步艱幾回抗疏動天顏丈夫那肯死牖下

金史四八  
卷三  
餘子從教活草間有分朱崖終著去無心白髮望生還  
故人目斷暮雲處霧雨濛濛山外山

書永嘉嘉禾驛

乙亥

老來倦躋攀悠悠憩山側層嵐軼穹霓紆紫困行客崖  
傾覺嶮巖征曲盤險迫石老枕雲根橋橫界野色海嶠  
吞暝暉松標挂辰極殘烟罩成幄長波曳如帛天際鳥  
知還溪澗魚自適幾忘物無我慮澹意常寂泛觀穹壤  
間天亦局於迹榮華忽彫枯俛仰遽今昔傾義俟再旦

心軌等寄驛愚公果何為老且欲移石

古意二首

年紅顏女敷芬對芳樹盈盈澹艷妝清歌雜妙舞凝  
倚高樓桐絲試一譜世間知音稀誰識姸節素清貞  
幽閨不作凡子婦容華委西山良人兮何暮空牀思  
悠明月正當戶

小籬采秋菊秋菊清且香采之欲寄誰聊以寓感傷感  
何所思故人天一方故人日以遠思君豈能忘瞻望

弗及西山傾夕陽黃昏人倚樓一聲笛何長

謁申屠御史

云渺梁碭山水深千年標致杳難尋  
祇今來伴東湖月  
有沙鷗識此心

挽竹薌龔侍郎

木難支大廈傾闔門判却赴波鯨  
歸來止為尋墳隴  
去不教知姓名  
賸有詩篇傳不朽  
相從野老話生平  
翩隻鶴扶雲去  
羣玉峰頭籍太清



挽平軒王府判

猶記瓊林錫宴時平軒折得好花歸而今花與人何在  
日暮江東雲自飛

夜宿嚴陵舟中

好風特地送帆開刺破蘆花雪幾堆浪裏烟波漁唱歌  
岸頭更點鴈聲催船空載取月同去蓬破偷將天入來  
拂早起看鷗睡醒笑僮抹過子陵臺

早起齋檐獨坐

輕寒測測雨冥冥不覺閒中春一庭老竹似欺窻草綠  
落梅微間翠苔青倏聽鶯語語調新曲默看蛛絲網碎屏  
物意人情兩相得莫容塵俗撓中局

題何氏山陰道院二首

從來道院江西好只為涪翁遂得名見說何家更清甚  
院中終日讀書聲

山陰偏被道家占我祖當年曾寫經君向陰中敞吟境  
何時相伴鶴來聽

和王槐城寄詩韻

慣熟齏鹽味誰云食澹難舊嘗司國子今又作儒官有  
手肯炙熱無羶不怕寒芹香至今在常夢到槐安

跋楊中齋詩詞集

江西派已遠後來無聞人許大能詩聲來自浙之濱奚  
奴背錦囊馬蹄蹋青春來派江西詩風月浩無垠翩翩  
佳公子皆綺紵其身惟君獨不然每恨無書貧習中國  
子監所積皆輪囷把酒讀君詩一字一精神句裏帶梅

香不浣半點塵家本住孤山和靖與卜隣吾聞詩之天  
不在巧與新纖穠寄澹泊清峭寓簡渾古律有崛奇可  
與子建親此詩實兼之體具衆美純載哦長短篇音節  
中韶鈞少游詞如詩二者皆逼真再拜卷錦還願言寶  
所珍

別中齋楊左丞

孤山久無主誰伴月昏黃歸興西湖動離情南浦傷官  
清從馬瘦政暇又詩忙莫羨和羹事林逋有暗香

黃處士公紹

公紹字直翁邵武人咸淳進士嘗讀胡文定公  
語心要在腔子裏自覺有警因作小軒名之曰  
在友人吳昇梅邊為之記宋亡後隱居樵溪長  
齋奉佛嘗謂少時讀康節詩有車書萬里舊山  
川之句嘗恨此生不見斯事今四海一家而余  
老矣惟知北游玄水之上問道于無為而已所  
著有韻會舉要行世

端午競渡櫓歌十首

望湖天望湖天綠楊深處鼓蕭蕭好是年年三二月湖  
邊日日看划船

鬪輕橈鬪輕橈雪中花卷櫓聲搖天與玻璃三萬頃儘  
教看得幾吳舫

看龍舟看龍舟兩堤未鬪水悠悠一片笙歌催鬧晚忽  
然鼓櫓起中流

賀靈鼉賀靈鼉幾多翠舞與珠歌看到日斜猶未足湧

金門外湧金波

馬如龍馬如龍飛過蘇堤健鬪風柳下繫船青作纜湖  
邊薦酒碧為筒

繡周張繡周張樓臺簾幕絮高揚誰賦珠宮并貝闕懷  
王去後去沈湘

櫂如飛櫂如飛水中萬鼓起潛蛟最是玉蓮堂上好躍  
來奪錦看吳兒

建雲旂建雲旂土風到處總相猶朝了霍山朝岳帝十

分打扮是杭州

蹋青青蹋青青西泠橋畔草連汀  
撲得龍船兒一對畫  
闌倚遍看遊人

月明中月明中滿湖春水望難窮  
欲學楚歌歌不得一  
場離恨兩眉峯

元詩選二集卷三



欽定四庫全書

元詩選二集卷四

庶吉士顧嗣立編

姚文獻公樞

樞字公茂號雪齋營州柳城人後遷洛陽少篤  
於學自期甚高宋內翰九嘉識其有王佐畧歲  
壬辰楊中書惟中與偕覲元太宗為燕京行臺  
郎中未幾辭去歲庚戌元世祖召居潛邸中統  
元年拜東平宣撫使明年召拜太子太師辭不

受改大司農四年拜中書左丞至元五年出僉  
河南行省十年拜昭文館大學士詳定禮儀事  
十三年拜翰林學士承旨十七年薨年七十八  
元貞二年贈崇祿大夫加少師至大三年追贈  
太師開府儀同三司封魯國公謚文獻初雪齋  
與惟中從太子庫楚南征軍中得名儒趙復始  
得程朱之書後棄官攜家來輝中堂龕孔子容  
旁垂周兩程張邵司馬六君子像讀書其間自

板諸經散之四方時河內許衡平仲廣平竇默  
漢卿並在衡雪齋時過漢卿茅齋而平仲亦特  
造蘇門盡室相依以居三人互相講習而北方  
之學者始聞進學之序焉許參政有壬曰皇元  
啟運道復隆古倡而鳴者為雪齋姚公蓋宋金  
之際兵燹頻仍版帙散亡殆盡獨首唱經學闡  
明斯道厥後名儒接踵而出氣運昌隆文章爾  
雅推迴瀾障川之功論者謂文獻公不在禹下

云

聰仲晦古意二十一首愛而和之仍次其韻

聖聖繼天極授受惟一中宣尼集大成玉振條理終盡性無思勉中道何從容乾坤有全德尚資參贊功

韋編日三絕孳孳何所嗜人道合天心天人本無二盈虛消息幾進退存亡事何當擬虛玄百世老輔嗣

觀人莫觀貌相馬不相肉羣經無釋辭熟讀意自足易道微九師春秋散公穀古今有成言此論非余獨

人皆與時行吾斯未能信士子有當憂憂在不如舜至  
哉伊洛傳為發前聖蘊先儒固所師未暇窮詰訓

高明縣萬象經緯成縱橫君子動靜機一以蹤天行後  
來英偉士槩舉名書生胡為事無用篆刻風物情

天命日流行維仁亦無息君子以自強茲言致其力求  
仁固多方寸心維自克四勿猶勇兵摧枯破敵國

任重不易勝無為鼎折足小利害成事不達緣欲速閉  
戶豈遺世入仕非干祿出處貴適時違時招自辱

洙泗浸微沒繼世承末流誰能汴淵源跬步還自留安  
宅久曠居正路奚弗由知津定何人接浙吾將求

夷齊顧名節不食餓首陽尚父應天討奮時清渭傍心  
跡異天壤日月同輝光道義有如此人惟重行藏

切問復近思乾行求艮止人道無他焉仁義而已耳原  
始可要終知生乃明死俛俛失路人何當與聞此

志士慕功業富貴鴻毛輕仁人懷道義不為功業縈富  
貴詎可求功業從自生狂狷奚所取無由見中行

大舜與人同人心本無惡未達為善資凡民曾不若臨  
深莫為高見是方知錯出門有餘師芻蕘未應薄

中孚自有喜无妄從生災達人弭憂樂世俗生嫌猜短  
翼登雲衢鷓鴣雖棲草萊要知庸玉汝天亦惜良才

富貴惟潤屋德藝能潤身蓬門信寒寂道勝生陽春顏  
淵百世士原思千載人先賢嘗有此吾輩甘常貧

得鹿未足喜喪馬勿用逐初萌得失心方寸成百曲纖  
人恣物情熊掌又魚肉曾推萬禍原古今從一欲

美人有碩德輝光映儒林躬耕以為食生民以為心螭  
蟠久存蟄巖棲念沛霖憂時恒若疾不為風雨淫

有士氣凌雲孤松挺高節壯懷入酣歌歌長擊壺缺鬢  
髮日以秋肝腸老於鐵從知養浩然此意潛消歇

四海一紅爐焦心待時雨羣生日熬熬無從求樂土百  
拜顙蒼天顙天天未許亨嘉會有期此非容力取

拔茅連其茹激濁揚其清雲山興大厦諒非一木成巖  
嶷萬斛舟水積舟乃行羣材惟柱石國勢何用傾



曠世少知音為誰歌白雪風雲重三顧捐軀輕嘔血考槃在澗阿永矢心如鐵千秋見鍾期朱絃難遽絕

天道有定常推行無少忒人心復何為遷變莫能測古人貴全交所貴在恒德黃金百煉餘不改當時色

甲寅春二

月廿有七日書于吐蕃滿底城東北二百里荒山行帳中為子益懇求故也敬齋姚樞識

### 題虢國夫人夜遊圖

宴安懷鴆毒蕩佚國將亡緬思天寶載聲色迷君王朝政出多門十九分權綱其誰堪炙手秦虢連諸楊攀附

勢莫比所冀保椒房宮中陪宴樂晝短疑夜長重為長  
夜游細馬馱寶裝胡不秉明燭宴行撤禮防一從此風  
熾野鹿踰宮牆五兵出洛泝四海同慘傷維時所貴顯  
赤族亦罹殃馬嵬脂粉暗岷山涕泗滂明年雖幸還大  
海翻田桑山河增慘澹日月銷精光問民瘡瘼中哭廟  
煨燼旁女寵禍何酷百悔不一償在莒豈足擬于茲不  
可忘

被顧問題張萱畫明皇擊毆

一作悟

按樂圖

阿萱五季名畫師尤工粉墨含春姿君王游蕩墮聲色  
不知聲色傾人國開元無逸致太平天寶奢風生五兵  
偃月堂近一作高幽薊遠潛謀不入夫容苑咸陽行色馬

鬼塵萱

一作畫

筆雖工恐未真四海蒼生半魚肉歸來豈

為香囊哭一日重開日月光黃金却鑄郭汾陽

賦龍池水

即平水之源

濁涇一斛幾半區白田一沃成膏腴汾水流源亦不殊  
循崖挾阜不可渠姑射山高草木敷英英四散清流疎

金匱要略卷之四  
本四  
清流溉田田即墾耕捷嗇夫疲糞車陳蕃一室還掃除  
淵明亦復新其廬伯夷柳惠聖之徒其源逼窄其流污  
春日秋霜與化徂何當得此輔唐虞中行未易良可吁  
晉人努力無為迂

濟瀆廟禱雨感應

石壇未盡赤章灰蝗孽冥銷澍雨來歸奏玉皇香案側  
天顏應為羽衣開

張元帥弘範

弘範字仲疇河內人蔡國公柔第九子也中統  
初授行軍司馬以平濟南李壇功進順天路管  
民總管移守大名六年授益都淄萊等路行軍  
萬戶十一年北兵渡江弘範為前鋒長驅至建  
康屢敗宋師上其功改亳州萬戶後賜名巴圖  
從中書左丞董文炳由海道會丞相巴延進次  
近郊宋主上表降師還授鎮國上將軍江東道  
宣慰使十五年張世傑立廣王昺於海上授弘

範蒙古漢軍都元帥徃平之十六年正月庚戌  
由朝陽港發舶入海辛酉二月甲申戰于厓山  
宋師大潰陸秀夫抱宋主昺赴水死嶺海悉平  
厓山之陽勒石紀功而還十月入朝未幾疾  
作端坐而卒年四十三贈銀青榮祿太夫平章  
政事謚武畧至大四年加贈太師開府儀同三  
司上柱國齊國公改謚忠武延祐六年加封淮  
陽王謚獻武仲疇善馬槊頗能為歌詩幼嘗學

於郝信使經故屬意文字為甚鄧侍郎光薦曰  
公天分英特雖觀書大畧率意吐辭徃徃踔厲  
奇偉據鞍從橫橫槊酹酒叱咤風生豪快天縱  
類楚漢烈士語許治書從宣曰王以事業之餘  
適其情性而聊以見之吟咏雅韻清辭雍容諧  
協固非服介冑者所能及至其讀韓信李廣傳  
諸作英氣偉論卓犖發揚又豈拘拘律度之士  
所能道哉

雨霽登樓

樓外雨初霽乾坤望眼明  
岸高秋漲滿簾卷暮霞生  
燕入泥香潤龍歸海氣清  
闌干殘照底一片古今情

柳塘避暑

避暑溪塘上翛然林木疎  
挂冠疑過鳥濯足礙行魚  
雨過波紋細風來樹影虛  
消閒長日事綦罷數行書

花影

明月招春魄移痕上碧窻  
暗香浮枕簟乘興滅銀釭



述懷

太古一輪月浮雲幾度漫陰晴從萬態桂影自高寒

赴大名路任

詔引春風下帝庭恩教遷鎮大名城天寒日短催行色  
霧重霜濃接去程鵬翼垂天今日志馬頭灑淚故鄉情  
深承父老殷勤送何日兒童竹馬迎

初夏

醉寢睡足碧紗涼簾卷薰風燕子忙滿地落花驚晚吹

金少卿八言  
卷四  
一溪水帶斜陽等閒歲月過難再牢落功名拙自傷  
青鏡祇愁霜鬢改光陰空老郭汾陽

新蟬

齊宮怨女夢初驚猶對薰風訴別情一自返魂遺舊殼  
便將秋恨入新聲斷橋高柳天將暮落日空山雨乍晴  
鐵石肝腸人聽得也應白髮為君生

雛燕

羽毛香潤態含癡睡足雲兜力尚微喚母但能啾唧語

戀巢猶倦往來飛  
薰風庭院簾初卷  
落日池臺人乍歸  
白鳳赤龍渾異事  
爭如隨分著烏衣

射柳

年少將軍耀武威  
人如輕燕馬如飛  
黃金箭落星三點  
白玉弓開月一圍  
簫鼓聲中驚霹靂  
綺羅筵上動光輝  
回頭笑殺無功子  
羞對薰風脫錦衣

述懷

春風滿鬢綠鬅鬆  
落落曾懷氣吐虹  
節操自知堅雪竹

行藏未必屬秋蓬歌終牛角兩行淚舞徹鷄聲一劍雄  
肯似少年場上客笙簫日醉軟香中

過雙塔

千丈黃塵倦客塗林梢遙認兩浮屠數家荒店留行李  
一帶遙山入酒壺勛業壯年勞夢寐等閒老境寄江湖  
前途默默深滄海惆悵西樓日向晡

宿龍門

落日蒼厓列翠屏翠屏圍宿暮雲橫溪聲清入詩人耳

山勢斜盤客子程  
青草路涼羸馬飽  
碧林月冷倦鳥驚  
明朝飛過龍門去  
直挽春風下赤城

述懷

飄零孤影寄天涯  
夢斷春風二鼓撾  
悶上心來須賴酒  
愁驅睡去勝如茶  
龍潛北海收雷跡  
豹隱南山養霧花  
天產我材應有意  
不成空使二毛華

襄陽荅王仲思

晝夜干戈備不虞  
等閒詩酒興全疎  
承君西屬三詞至

媿我東回一字無  
麾下雄兵山有虎  
目中窮寇釜奔魚  
秋風咫尺襄樊了  
好約扁舟泛五湖

風柳

澹澹池塘近楚宮  
綠腰裊娜學盤中  
亂搖芳草飛輕白  
細搭朱闌拂落紅  
枝上嬌鶯啼恰恰  
樹邊舞蝶意恁恁  
東君應著吹噓力  
要把春愁一掃空

南征二首

百戰歸來氣未鬆  
紫泥又起作元戎  
樓船萬艘三山外

塞馬千羣百粵中舉目山川渾各異傷心風景不相同  
明年事了朝天去銅柱東邊第一功

離多會少古皆然惟我平生苦太偏已是十年驅戰馬  
又還萬里駕征船相思回首南天角獨許傾心北闕邊  
寄語故人知道否幾鯨沈海在來年

讀韓信傳

一怒燕齊楚趙收將軍今古果誰傳後來肯為陳稀計  
先日何辭蒯徹謀自是多能慙噲等何能輕舉學留侯

可憐一片肝腸鐵却使終遺萬古羞

共賦行田

不屑人間事業忙日迷歌舞少年場樓臺夜月延佳客  
花竹春風擁謝娘笑倩釵金挑燭影醉嫌杯玉擘橙香  
誰知原上農家子鞭梘殘星曉露涼

春雪

餘寒料峭黃昏暮驚見東風吹柳絮杜陵野老獨歸來  
却入灞陵橋上路黃鶯愁立花深處恨濕金衣寒兩羽



園林渾似晚春時一片瓊花飛玉樹

寄樞密院郭良弼

三百年基數戰休君臣束手願歸囚上天有命聖皇福  
下國無謀賢相籌笑我青蠅隨驥尾看人滄海據鰲頭  
此行幸見太平了收拾琴書覓舊遊

淮陽王佳句可摘者五言如月夜獨酌云山風吹雨  
去海月上天來七言如晚涼樓飲云龍駕金烏歸海  
北鯨吹壁月上天東初夏云香盈脾蜜蜂銜歌泥足  
梁巢燕寢便遇雨未發云絕岫黑雲籠古殿虛檐玉  
柱碎空階述懷云中酒未醒過似病搜詩  
不得勝如愁亦復雄健新警耐人吟咏也

槐井

翠圍石甃雨苔青影落寒泉墮月明酒醒客懷無處著  
綠陰風送轆轤聲

遊春

閒逐東風信馬蹄一鞭詩思曲江隄行行貪詠梨花雪  
却被桃花約帽低

讀李廣傳

弧矢威行塞北屯漢家飛將氣如神但教千古英名在

不得封侯也快人

墨竹

麝墨芸香小玉叢  
澹烟橫月翠玲瓏  
小屏春鎖綠窻夢  
也勝湖江烟雨中

射虎

黑風萬騎卷空山  
怒吼巖林出錦斑  
得意將軍飛鐵鏃  
忽驚一點草梢殷

出獵

臂鷹攜犬胯腰弓四野長圍馬疾風恨殺棘林狐兔走  
肯教容易出圍中

新燕

海棠開後月黃昏王謝樓臺寂寂春柳外東風花外雨  
香泥高壘畫堂新

青杏

落盡殘紅綠滿枝青青如豆釀酸時佳人摘得新嘗怯  
一點春愁鎖畫眉

柳絮

東風殢殺柳梢頭  
吹去香棉得自由  
不到池塘成翠靨  
顛狂飛入酒家樓

聞角

戍樓一曲老龍嘶  
霜滿秋空月影西  
客裏夢回聽不得  
殘燈明滅伴人啼

寒食後

家家鑽火露新烟  
花吐殘紅柳吐棉  
底是遊人腸斷處

杏桃影裏拆鞦韆

碧桃花

應是玄都觀裏仙為嫌白澹厭紅蔫故栽一種新顏色  
疑是飛仙墜翠鈿

燭淚

惜別終宵話不休煌煌燈燭照離愁蠟花本是無情物  
特向人前也淚流

梅雨

輕雲薄薄暗江干  
幾陣紗窗送嫩寒  
濃醉呼童新摘得  
未黃梅子已微酸

拆鞦韆

畫柱青苔臥寂寥  
綵繩無計戀春嬌  
可憐明月梨花院  
閒殺春風第一宵

榴花

猩血誰教染絳囊  
綠雲堆裏潤生香  
遊蜂錯認枝頭火  
忙駕薰風過短牆

晚蟬

三生齊女舊精魂  
哭斷殘陽雨後邨  
千古閒愁無處著  
斷腸聲裏又黃昏

驟雨二首

滄海龍飛霹靂驚  
雲間電影萬蛇明  
六丁怒挽天河水  
特為人間洗甲兵

風擁黃雲龍駕海  
雷驅紫電雨翻盆  
長虹千丈忽截斷  
一片風波起市門



春信

庾嶺梅花噴雪香  
灞橋烟柳弄鵝黃  
故鄉望斷無消息  
獨倚東風鴈數行

霜月早行

霜滿溪橋月滿山  
哦詩驢背怯清寒  
那知年少青樓客  
醉擁芙蓉夢未闌

過江

磨劒劒石石鼎裂  
飲馬長江江水竭  
我軍百萬戰袍紅

盡是江南兒女血

柳眉二首

似斂還舒嫩覺羞隋隄如為古今憂翠尖管取傳春意  
莫向長亭管別愁

睡起紗窻對曉匳暫時初識遠山尖多情笑殺張京兆  
應恐香螺浣玉纖

張珪

附

珪字公瑞自號澹菴弘範子至元十七年拜昭

勇大將軍管軍萬戶弘範卒屢著戰功二十九年入朝拜鎮國上將軍江淮行樞密副使大德三年擢江南行臺侍御史換文階中奉大夫遷浙西廉訪使入僉樞密院事拜江南行臺中丞謝病歸至大初召為太子諭德進賓客拜御史中丞皇慶初遷樞密副使延祐初拜中書平章政事後以大司徒謝病家居至治間起為集賢大學士尋復入中書封蔡國公知經筵事泰定

二年得旨暫歸三年復召拜翰林學士承旨知制誥兼修國史繼得旨還家四年薨初淮陽王平廣海得宋禮部侍郎鄧光薦命公瑞師事之光薦嘗遺一編書目曰相業語曰熟讀此後必賴其用故其為學不尚章句務求內聖外王之道學書腕力尤健端重嚴勁無慚筆諫之臣真能世其家者也

登茅山

久矣厭朝市心棲巖壑幽今朝復何朝陟此蒼峰秋玉  
宇正寥廓風籟寒颼颼平生獲壯觀萬里供寸眸烟嵐  
縹緲中青原間桑疇琳宮一何麗突出寒巖陬茅君此  
仙去遐想希前修胡為塵土蹤歲月徒悠悠何當乘雲  
蚪八表同周流念念竟忘言凝神入冥搜彷彿鸞鶴音  
還來故山游

喜客泉

昔聞喜客泉今來欣見之俯檻一凝盼珠璣沸清池山

靈蘊神秀出此天下奇嗟余時所忌而泉喜何為丹忱  
天自知顧茲諒弗疑

晉檜

晉代王氣終劫灰今幾時獨餘此蒼檜鬱鬱貞秀姿深  
根盤厚地雲漢參高枝風霜固久歷雨露無偏滋一笑  
媚時榮朝盛夕已衰

陰陽井

仙人修煉地玉井著神功日月雙輪見陰陽兩竅通可

堪清徹底那便施無窮尚冀丹砂力當澆塵念空

展子虔游春圖卷

東風一樣翠紅新綠水青山又可人料得春山更深處  
仙源初不限紅塵

題王鵬梅金明池圖

萬穠齊奔競出頭錦標奪得志應酬吳儂識此爭先著  
一度贏來便可休

題周曾秋塘圖

荷枯葦折澹秋塘岸側芙蓉鏡裏妝水宿雲飛禽共樂  
不須別處覓瀟湘

楊廉訪真

真字煥然又名知章乾州奉天人母嘗夢東南  
日光射其身旁一神人以筆授之已而真生甫  
勝衣嘗信口唱歌有紫陽閣之句問其故則不  
能荅也未冠夢遊紫陽閣景趣甚異自悟已前  
為紫陽宮道士後因以自號金末舉進士不中



乃作萬言策指陳時病未及上而歸教授鄉里  
歲癸巳汴京降與微服北渡依冠氏帥趙壽之  
戊戌太宗詔宣德課稅使劉用之試諸道進士  
與試東平兩中賦論第一從監試官北上謁中  
書耶律楚材薦授河南路徵收課稅所長官兼  
廉訪使在官十年乃請老於燕之行臺壬子世  
祖在潛邸驛召與參議京兆宣撫司事累上書  
得請而歸秦中學者稱為關西夫子乙卯疾篤

引觴大笑而卒年七十賜謚文憲所著有還山  
集六十卷行世遺山先生元好問撰墓碑曰紫  
陽博覽強記作文刻刮塵爛創為裁制以盜襲  
剽竊為恥其持論亦然秦中百年以來號稱多  
士較其聲問赫奕聳動一世蓋未有出其右者  
江漢先生趙復曰紫陽其志其學粹然一出於  
正其言精約粹瑩而條理膚敏名教中南宮雲  
臺也

諭內

天地具此身胚胎乃潛受甚者感異類焉敢計妍醜冠  
蓋傳百世萬求無一售所以孟軻氏立言痛無後飄零  
風塵際拚作窮獨叟四年四懸弧吉兆自申酉顧我果  
何人報施嗟已厚今冬復爾耳

魏崔琰太祖曰  
諺語生女爾耳

喜在得

分割女亦吾所出胡為生可否天下盡男子無姑卒無  
婦伏羲畫八卦錯綜定奇偶阿駒才五歲見客謹拜叩  
稍稍愛紙筆門戶知可守女生願有家教之奉箕帚乘

龍非所期隨分逐鷄狗

陶九嫂

述斬春劉益甫所言以  
為強暴不道者之戒

勿輕釵與笄勿賤裙與襦  
柘皋一女子健勝百丈夫  
家住廬州東庫藏饒金珠  
天陰夜抹漆暴客萌覬覦  
胠篋不足較父兄罹剗屠  
女年十五六以色竟見驅  
捕捉星火急亡命洞庭湖  
既為陶家婦九嫂從渠呼  
寢息風浪中四隣唯菰蒲  
瑟瑟未免合積久產二雛  
春秋祭享絕對面佯悲吁  
向來郎鬢黑漂泊生白須  
身後乏寸土奈

我子母孤干戈又換世幸在昔塵區何當決歸計卒歲  
容相娛聞語畧不疑意謂癡且愚銳然棹輕舟攜抱登  
長塗青氈復舊物水陸多膏腴女兒拜夫前靈貺焉可  
誣兒初有祕祝欲荅神明明扶給郎俟西祠徑往公府趨  
畫地訴首尾曾不遺錙銖官長怒咆哮俄頃就執俘械  
杻滿蟻蝨懲暴臨街衢使女坐其旁笑頰如施朱自推  
二雛去急請加鑕銖官曰產爾腹頗亦憐呱呱女云此  
孽種不可謂不辜環觀交感泣猛烈古今無謀事鬼神

畏失機或斯須甘露若訓注反遭宦豎圖政類竇桂孃

兒同心實殊

桂孃建中時人見杜牧言

隱忍寂寞濱豈甘盜賊污白

玉投青泥至寶終莫渝此讐若不雪何以見烏烏一息

傳萬口南北通燕吳夫願女為婦婦願女為姑綠林肝

膽寒低頭羞穿窬佳人固不幸能還誰爾拘何事原巨

先遂使輕俠徒

見前漢原涉傳

孫烈婦歌

婦姓吳小字二十平陸人適進士孫闕

平陸有烈婦地望雄諸吳從居孩提問體貌迴爾殊舉

家愛惜心不啻千金珠眉拂夏繭蛾鬢彈春林烏夫容  
羨顏色冰雪羞肌膚十二巧鍼指十四婉步趨姻戚未  
省識閨閭何曾踰孫郎邑中秀少小依師儒雙親為擇  
對買紅纏酒壺青鸞得綵鳳誓結百年娛屈已接妯娌  
盡心奉舅姑孰謂連理枝半壁先摧枯春風合歡牀分  
守夜雨孤西隣久欽慕指王氏子誠與六禮俱賄好靡不周  
下逮役使徒父兄去世亂倉卒誰攜扶母嫂憐幼寡且  
微反哺雛號訴竟莫察僵仆氣不甦同穴大義在初言

寧忍辜日間勢轉逼託媒致區區將汝已死婦配我未  
葬夫朝決暮即行參差當自屠王族忽承命搔首久跼  
踟此事難為諧此理古亦無女聞一撫掌天道卒敢誣  
腐骨尚知愛而況生人軀素志從此伸里巷咸驚吁秋  
風萬馬來所至皆丘墟粟堆坡頭路月黑忘崎嶇鄉兵  
共烏合馬能保不虞俄頃鼓聲絕崩潰東北隅壯者被  
殺戮弱者遭縻驅婦時飛懸屋翩若赴水鳧皎皎盈尺  
玉未甘蒼蠅汙鮮鮮全匹錦豈容濁穢塗向是健男子



足授丈二及航海鱠長鯨盪荆縛於菟悲哉女子身裙  
裾鬱壯圖胡不具始末奏之達帝都外則詔郡國內則  
正宮襦胡不構祠宇揭之當官衢近使感義節遠使懲  
淫愚不然布臺閣直筆一再濡特書彤史上永世瞻範  
模

題趙繼卿耕隱圖

惜君玉雪成老醜知君近出太常後

太常名之傑諫南北征知名

求

田問舍計差早恐君不是扶犁手長安冠蓋闢於雲但

說子真耕谷口此心肯處萬事了直待鐘鳴奈衰朽溪  
山入眼畫樣新雨翠烟嵐浮戶牖松亭可琴水可舟中  
有石田三百畝剩鉏烏豆種紅秫十分桑麻居八九軟  
浸豆屑飯晨犢濃湯去聲秫腴芻社酒冷盆縑絲給公上  
挑燈紡績裏妾婦索錢豪吏喜食肉準備羹材養鷄狗  
荊棘滿野獨漏網太常遺澤亦已厚軍興科徭古不免  
為勸比隣死莫走殘年得飽實大幸傍舍餽籬插花柳  
君家平日無雜賓我輩過門須一扣若非代北少陵翁

定是周南紫陽叟更闌朗咏除夜篇聊與蒼生洗塵垢  
李王夜宴行

玉漏沈沈寒夜永瑤階月轉梧桐影重門深鎖寂無人  
醉倚銀屏呼不醒茜裙六幅拖朝霞飛雲髻盤雙鴉  
一生偏得君王意笑酬新寵彈琵琶嬌小不禁弦索滑  
腸欲斷時輕一抹半遮粉面回春波等閒忘却龍香撥  
歡娛未畢北兵來三十六宮如死灰茅茨老死定誰問  
紛紛哀樂長相催

晉溪行感故人崔君寶馮達卿至

并刀射日霜華起誰翦滄溟半邊水千年冷浸西南天  
瑠璃萬頃清無底瑤階玉殿聖母家春陽走碎油壁車  
天陰人靜百鬼出山風泠泠吹浪花花飛愁怕桂輪濕  
蟄龍潛抱神珠泣馬蹄剝落夢不到解后與君成雅集  
金斗澱澁浮新香秦客思家偏斷腸曲江池館定何似  
滿眼青田空夕陽

金谷行

洛陽園池天下無金谷近在西城隅晉時花草不復見  
野人猶解談齊奴齊奴豪奢誰比數酒酣愛擊珊瑚株  
後堂春風滿桃李中有一枝名綠珠千金買步障百金  
買氍毹時時吹笛替郎語雲窻霧戶長歡娛層階欲下  
須人扶豈料一日能捐軀紅飛玉碎頃刻裏空使行客  
悲躊躇樓頭小婦感恩死君臣大義當何如

有懷梁仲經父

美人熒熒在何處海闊天低隔烟霧珊瑚零落芙蓉空

咫尺相望迷去路翠輦金輿雙鳳皇風吹環佩聲琅琅  
壺觴狼籍事已往一日萬里愁茫茫劉郎竟是誰家客  
歲晚霜華林葉赤美人熒熒在何處鴨綠江頭江月白

寄商孟卿

無窮唯永日有盡是流年白髮誰能免丹經恐妄傳會  
心人健否到處冢纍然袞袞風波地方思萬里船

寄朱生

不知朱記室歲晚竟

一作更

如何老舅家誰託孀親鬢已

皤林泉憂患少京國是非多為客幾時了悲涼彈鋏歌

河道邨

官路人家少邊城驛使頻季鷹終去洛王粲近歸秦天  
地羣龍鬪泥沙尺蠖伸親朋應笑我頭白傍風塵

宿草堂二首

百頃逍遙苑千年羅什家荒林葺屋小細逕逐溪斜老  
檜今何在瑞蓮春自花山靈憎俗駕朝暮白雲遮  
廢寺人蹤斷幽溪野性便魚須分浪細虎跡印沙圓馴

雀偷僧飯飢蚕破客眠獻芹吾豈敢直欲斲山田

留別儒禪

溪行魚不畏巖宿虎相隨怕客談新事逢人誦舊詩衲  
輕聊覆體米滑欲翻匙僧臘知餘幾霜鬚一作鬚已滿頤

謝顧副言問疾

久謝公家事時勞長者車可憐新病後未覺故人疎渭  
北偏饒夢河南近得書相忘吾豈敢欲出怯籃輿

雨夜



關河隔千里筆研寄餘生老覺鄉心動聞知世念輕微  
風搖竹影細雨簌檐聲落魄緣何事吾今不用名

題城南陰氏永思亭

結廬守丘壟種柏長孫枝不為城府屈況求時世知曾  
無綵衣夢誰有角弓詩薄宦歸來晚因君涕滿頤

訪耿君玉隱居

居幽穿洞府岸狹束溪流細逕隣翁熟懸厓遠客愁橋  
明山月上窻暗野雲浮世事何曾到年侵亦白頭

飲山家

為愛春風好乘時把一杯百年雙眼在萬事寸心灰  
花向坐中落客從雲外來詩成無紙筆畫地惜蒼苔

青峰寺哭燦然弟

長別惟生死難忘是弟兄但吾今到處想汝昔曾行  
鄉社三年阻兵戈一夢驚青山風雨夜此去更傷情

晚至青口

長年困行役短髮易飄零世事驚春夢交親散曉星  
燒

痕侵路黑柳色夾隄青落日明霞底原情動鵲鴿

浮生一首懷裕之

漢節飛雲外秦城落照邊浮生空自老歸計定何年淚  
滿陳蕃榻心搖祖逖鞭短詩聊遣興羞向故人傳

撫州

北界連南界昌州又撫州月明魚泊夜霜冷鼠山秋為  
客無時了勞生有許愁殘年嬰世網吾欲謝浮一作  
溪鷗

至滑州堤

舊事悲存沒殘年厭往還孤城晴雪底雙塔暮雲間馬

沒長津

一作堤

在龍歸老井間隔林青數點多是濬州山

宿南石橋

江流平入楚山勢遠連秦岸柳猶含凍溪花欲破春石  
銜車轍古沙印虎蹄新晚境長為客空山不見人

出鴉路宿北石橋

燒火連山暗春雲出谷遲避人投野店繫馬就疎籬舊  
字頽垣在新愁客枕知清明無幾日細與數歸期

承德亨見訪

世事元無定人生只合閒君今悲白髮我亦負青山廢  
郭官居冷荒年旅食慳最憐情意厚朝至暮方還

次答正卿二首

客愁青鏡裏歸夢白鷗邊故國人何在新秋月又圓米  
鹽逢此日詩酒負殘年長羨平林鳥雙飛入暮烟

何人依玉樹有客隱金華老覺身為累時勞夢到家且  
騎山簡馬誰識子陽蛙日暮秋風起飛塵滿畫叉

金史卷四  
卷四  
荅京叔文季昆仲

何處音書至劉家好弟兄科名先世在詩律早年成嶺  
北饒風雪淮南困甲兵論文吾有意尊酒阻同傾

未歸

渭水遙通洛函關近隔秦百年垂老日千里未歸身夢  
寐嫌為客妻孥不諱貧一官無可戀花氣五陵春

雨夜

窻秋風獵獵檐夜雨頻頻蛩韻愁於我燈花笑向人此

身猶在洛何日定歸秦不必黃梁熟真慙白髮新

次荅伯直侍郎三首

家貧餘四壁地勝接三鄉才賦狂司馬形容老遂良畫  
眉從爾濶舞袖為誰長生死交情在書紳示不忘  
升斗貪微祿關河隔故鄉詠歸懷靖節知足媿張良不  
問黃金盡猶憐白髮長江湖風浪急相照勝相忘  
洶洶何時定飄飄著處鄉音書黃耳絕兄弟白眉良晚  
境情偏重良宵話更長舊遊零落盡別後實難忘

冠氏留別趙帥

主人情爛漫客子自奔忙  
不見猶頻夢相逢合斷腸  
秋涼拋藥裏夜雨倒壺觴  
回首高城北幽燕去路長

泊舟老鸛嘴

袞袞風生背涓涓月印沙  
船頭平壓浪櫂尾旋成花  
老去長為客愁來轉憶家  
雙棲疎影裏羨殺柳橋鴉

送張彥叔還陝二首

管寧猶避世裨竈豈知天  
安穩將何日奔忙各暮年  
且



陪山簡醉未辨水衡錢便了公家事癡兒更可憐  
翰墨知名久風塵會面稀病來嗟我老秋到惜君歸瘦  
馬馱殘夢寒蟬送落暉區區問逋負直覺宿心違

送靳才卿之平陽

却向他

一作西

州去蕭蕭雪滿簷立園初到眼兒女總關

心汾水野烟白霍山寒霧深得歸歸更好吾亦愛秦

一作

春  
音

呈君美

上陽門外路日暮獨歸時齒髮各已

一作已

衰謝風塵仍別

離斷雲橫紫閣急雨掠蒼陂地勝饒新句君將寄阿誰

得邛大用書復寄

百年真夢寐萬國久風塵老去偏相憶書來恨不頻季鷹猶在洛王粲未歸秦谷口知何似他時願卜隣

贈楊飛卿

吾宗久零落之子亦中年紫邏

一作閣

堪高臥玄經擬共

傳前言非戲爾舊處想依然留著新詩筆教隨過海船

關  
文紀行贈以小步馬

洛水西頭路桃花夾岸香偏宜紅叱撥小試紫游韁雨  
徑沙初軟春山草正長杖藜猶過我此別莫相忘

答張君美

我無茅一把誰有橘千頭應物機仍拙憂時涕亦流漫  
違魚鳥信豈為稻粱謀老去輕三仕詩來抵四愁

懷同祖卿

東府倉皇別西河迤邐回元戎期坐嘯上客入行臺夢

裏惠連句生前張翰杯龍池清似淙應恨不歸來

宿重陽宮

邨落到山盡軒窗臨水多野禽如舊識隣叟漸相過林  
靜連官竹籬疎補女蘿夜深眠不著倚杖看星河

同完顏惟洪至樓觀聞耗

蓬萊隔滄海虎豹護天關白髮知誰免青牛竟不還茶  
分丹井水詩入草樓山顧我負何事區區鞍馬間

陶君秀晉人嘗為司竹監使因祖淵明嘗游五柳

莊為立五柳祠在縣東西原方見有祠堂詩碑

淵明

詩寄陶監使君秀

向禹城侯先生司竹時與扶風張明叙

六曲李仲常鳳翔董彥材從之學如白雲樓海棠  
觀所謂勝游也兵後吾弟主之亦西州衣冠之幸  
感今慨昔不能不惘然也握手一笑知復何年敢  
此以為質兼示鄆亭趙秀才四首

家世江頭令風流竹裏仙  
海棠烘曉霽野筍澹春烟  
尊俎違今日弦歌記昔年  
挂冠吾有意送老白雲邊

違別亦已久蕭蕭雙鬢絲自憐多病後不似早年時暮  
雨千山道春風五柳祠剩留溪上竹到處刻新詩

不見長楊館人家只翠微溪流環監署林影入宮闈花

鴨夜方靜竹飜秋更肥青仙無處問老淚日霑衣

庚先  
生舜

臣後其家人輩夢  
為青仙觀管香使

老病鄉心動艱危世契疎少年知自立近日定何如渭  
上千叢玉陂頭半尺鱸往來元不惡容我坐籃輿

呈松茂

冰雪相看十五年  
照人風采只依然  
我今自分蓬蒿底  
君獨何心道路邊  
渭北幾時無夢寐  
終南在處有林泉  
不妨便作求田計  
伴取疲揚草太玄

寄商孟卿

一望東原一惘然  
芸窗誰與伴高眠  
秋風有意招張翰  
春草無由見惠連  
王母信音青鳥外  
溪翁心事白鷗邊  
殷勤為向侯芭道  
判却殘年老太玄

病中趙之讓見訪

洛陽三月不得雨君家西來常苦陰酒杯雖好怕到手  
藥裏底事猶關心對牀幾日肯相就擁被中宵愁獨吟  
莫疑衰疾便揮謝解吐新句酬知音

次荅庭幹

歲晚周南見此翁未應抵苦壓塵籠人須老後心方定  
詩到工時例合窮飯顆儘從嘲杜甫荆釵元不笑梁鴻

倚楹三詠鵠臬句始信離騷繼國風

宋章有鵠臬  
之句

病中次荅



一別南塘十五年杖頭虛貸買山錢  
梁園不少狂司馬洛社偏宜病樂天  
無那形骸親藥裏肯將心計事征塵  
他時湧翠亭前水又是吾家恰對泉

寄長安

龜城舊事空悠悠  
俛仰一別今幾秋  
遙知清談落塵尾  
應悔小字書蠅頭  
三川烟月四時在  
兩地關河千里愁  
道人活計行處是  
早晚策杖來相求

草亭既成招肥鄉竇子聲

金定巳下  
卷四  
走徧江淮鬢未華歸來重對舊生涯論醫不待肱三折  
作賦曾聞手一叉晚歲蕭條嗟我老春風搖蕩醉誰家  
殺鷄為黍初心在目斷西雲日又斜

送馬公遠歸桂菴

瘦馬踏雪來長安老向白雲依空山長年獨處邨落裏  
幾日一笑塵寰間竹院風清聯夜話松齋月冷趁晨班  
終南太白四時好不得倚闌相對閒

長安感懷

此心只

一作直

欲作東周再到長安已白頭往事無憑空

擊楫

一作聲

故人何處獨登樓月搖銀海秦陵夜露滴金

莖漢殿秋落日酒醒雙淚眼幾時清渭向西流

### 延祥觀

長庚誰遣降精魂氣應潛龍道自存玄女式中消日月  
春明門外轉乾坤諸王決計戡多難睿主膺期即至尊  
天命自歸赤符後遺風猶記老人邨

### 重陽觀

終南佳處小壺天教啟全真自此仙道紀宏開山色裏  
通明高聳日華邊南連地肺花浮水西望經臺竹滿烟  
最愛雲窻無事客寂然心月照重玄

遇仙觀

一飲甘河萬事休喚回蝴蝶夢莊周口傳鉛汞五篇訣  
神馭雲龍八極遊寰海玄風開羽客遇仙清迹想羶裘  
百年更有何人酌人自無緣水自流

通濟橋

壬子秋九月  
被召過此

五丁鑿石極堅頑  
陌上行人得往還  
月魄半輪沈水底  
虹腰千尺駕雲間  
鄭卿車渡心應愧  
秦帝鞭驅血尚殷  
為問長江深幾許  
雪風吹馬下天山

試萬寧宮

月澹長楊曉色清  
天題飛下寂無聲  
南山霧豹文章在  
北海雲鵬羽翼成  
玉檻玲瓏紅露重  
金爐縹緲翠烟輕  
誰言夜半曾前席  
白日君王問賈生

楊紫陽跋趙太常擬試賦  
彙後云泰和丙寅春三月  
二十五日萬寧宮試貢士  
上躬命賦題曰日合天統

侍臣初甚難之而太常卿北京趙公適充御前讀卷  
官獨以為不難即日奏賦議乃定既而中選者纔二  
十有八人僕時甫冠獲試廷下而席屋偶居前列朝  
隙聞異香出殿檻間一紫衣人顧余起問題之難易  
及氏名里貫年齒而去少頃復相慶曰適駕至耳薄  
暮出宮傳以為希遇按萬寧宮廷試當在金章宗泰  
和六年紫陽時年二十一下第  
後乃作此詩蓋紀一時之事也

至日

憶初年少在南梁兄弟歡遊久未忘春色共傾花底酒  
雨聲常對竹邊牀怒鯨一夕掀洪浪斷鴈何時續舊行  
草負亂來同被約尺書不到十年強

謁廟

會見春風入杏壇奎文閣上獨憑闌淵源自古尊洙泗  
祖述何人似孟韓竹簡不隨秦火冷楷林空倚魯城寒  
飄零蹤迹千年後無復東西老一簞

題終南和甫提點筠溪

仙家靜住西南溪竹外須信無餘師平生高節鬼亦畏  
一點虛心人得知林深自有天地在歲暮不受風霜欺  
何時借我半窗月萬里黃塵雙鬢絲

錄汴梁宮人語十九首

一入深宮裏經今十五年長因批帖子呼到御牀前  
歲歲逢元夜金蛾鬧簇巾見人心自怯終是女兒身  
殿前輪直罷偷去賭金釵怕見黃昏月殷勤上玉階  
翠翹珠掘背小殿夜藏鈎幕地羊車至低頭笑不休  
內府頒金帛教酬賀節盤兩宮新有旨先與問孤寒  
人間多棗栗不到九重天長被黃衫吏花攤月賜錢  
仁壽一作聖生辰節君王進玉卮壽棚兼壽表留待北還



時

邊奏行臺急東華夜啟封內人催步輦不候景陽鐘  
畫燭雙雙引珠簾一一開輦前齊下拜歡飲辟寒杯  
聖躬香閣內只道下朝遲扶杖嬌無力紅綃貼玉肌  
今日天顏喜東朝內宴開外邊農事動詔遣教坊回  
駕前雙白鶴日日候朝回自送鑾輿去經今更不來  
陡覺文書靜相將立夕陽傷心寧福位無復夜熏香  
二后睢陽去潛身泣到明却回誰敢問校似有心情

為道圍城久妝奩鬪搗軍入春渾斷絕飢苦不堪聞  
監國推梁邱初頭靜不知但疑牆外笑人有看宮時  
別殿弓刀響倉皇接鄭王尚愁宮正怒含淚強添妝  
一向傳宣喚誰知不復還來時舊鍼線記得在窻間

北去遷沙漠誠心畏從行不如當日死頭白若為生

陶

成輟耕錄云楊文憲公錄汴梁宮人語十九首雖一時之所寄興亦不無有感傷之意按紫陽又嘗作汴故宮記敘次甚悉至今讀之猶可想見其制度規模也亦載輟耕錄及蘇天爵元文類中

酬昭君怨

玉貌辭金闕，貂裘擁繡鞍。  
將軍休出塞，上雪偏寒。

遊嵩山十三首

轘轅坂

盤盤十二曲，石嶺瘦崢嶸。  
脚底有平地，何人險處行。

太室

茂陵骨已朽，萬歲恐虛傳。  
莫上中峯頂，秦城隔暮烟。

少室

方若植菟冠，森若削寒玉。  
明月夜中遊，誰家借黃鵠。

啟母石

頑石本在世啟母人亦知可憐宋太后死罵寧馨兒

少姨廟

路傍雙闕老蔓草入荒祠時見山家女燒香乞繭絲

盧巖

避名名自在身瘠道還腴未到千年後空巖已姓盧

龍潭

壯哉昌黎筆談笑排佛禍不言動鬼神翻疑觸雷火

五渡水

幾時落東溪曲折臥天漢語似登山人可飲不可盥

測影臺

一片開元石愈知天地中今宵北窻夢或可見周公

箕山

土階墮渺茫多少曹與馬底事住青山近代無讓者

潁水

解后洗耳翁去飲上流水此日倘相逢黃犢應渴死

卓錫泉

大士傳心要諸方叩道玄至今卓錫地瑩徹有遺泉

巢翁冢

既知田間樂焉知田間苦惟是唐虞朝所以有巢父

讀汝南遺事二首

軼道牽羊事已非更堪行酒著青衣裏頭婢子那知此  
爭逐君王烈燄歸

六朝江水故依然隔斷中原又百年長笑桓溫無遠畧

竟留王猛佐苻堅

讀通鑑

風烟慘澹駐三巴漢燼將然蜀婦髻欲起溫公問書法

武侯入寇寇誰家

輟耕錄霍治書云紫陽楊煥然先生讀通鑑論漢魏正閏大不平之遂修

漢書駁正其事因作詩云云後攻宋軍回始見通鑑綱目其書乃寢

紫陽閣

碧瓦朱甍動紫烟清風吹袂渺翩翩夢回憶得三生事

悔落黃塵六十年

題二賢祠

從經操懿狎孤兒世事尤非扣馬時若道後人真可誑

空山焉有二賢祠

癸丑二月望奉天楊奐題首陽山夷齊廟同里王璩張端平陸員擇從行

涿南見蠶婦本汴梁貴家

蠶月何曾出後堂干戈流落客他鄉羅衣著盡無人問  
自把荆簪摘野桑

出郭作

燕姬歌處轉鶯喉燕酒春來滑似油自有五陵年少在



平明騎馬過盧溝

過湯陰崇壽寺二首

城荒寺古冷於冰絳帳誰燒照佛燈  
閒繞空階觀石刻  
偶聞音語得鄉僧

老僧七十六春秋霜滿修眉雪滿頭  
見說故人指病目  
幾時攜杖入西州

憶君美

寒鴈明朝下五湖  
長安西望獨躊躇  
無情誰似張公子

兩見秋風不寄書

寄君美二首

不走瀟東走澗西八年迎送愧山妻  
長思醉臥高堂上  
滿枕春風聽竹鷄

銅柱從君泣墮鳶夷心事五湖船  
頭顱如此人間世  
不得青山對暮年

管寧濯足圖

踏遍遼東未是癡  
蓁林欲穴只心知  
好留一掬黃泥水


漫却曹郎受禪碑

荅客

仕晚自知為學拙  
家貧人道治生疎  
滿山薇蕨春風老  
昨夜隣翁有報書

泛舟

燕子迎風掠水飛  
樓前楊柳綠依依  
十年不作南塘夢  
怕見殘陽上客衣



元詩選二集卷四